

आकाशवाणी

1. लोकसभा च अज्ज पैहलगाम आतंकी हमले ते आप्रेशन सिंदूर बारै चर्चा शुरू होग।
2. प्रधानमंत्री नरेंद्र मोदी होरें आखेआ ऐ जे आप्रदेशन सिंदूर नै साबत करी दिता ऐ जे भारत गी नशाना बनाने आहले दुश्मन ते आतंकवादिणं लेई कुतै बी सुरक्षित थाहर नेई होग।
3. उत्तराखंड दे मंसादेवी मंदरै च पेश आई दी घटना दी मैजिस्ट्रेट जांच दा हुकम जारी कीता गेआ ऐ, अज्ज उत्तर प्रदेश दे बाराबकी च बी इक मंदरै च मची दी नस्सभज्ज च 4 जनें दी मौत, 29 घाऽल।
4. यूरोपीय संघ शा अमरीका औहने आहले मते सारे समेयानें पर 15 फीसदी शुल्क लाने आसतै दवें धड़ें इक बपार समझौते गी मुकदा रूप दिता।
5. थाईलैंड ते कंबोडिया अज्ज सीमा विवाद गी सुलझाने लेई गल्लबात करडन।
6. भारत ते इंग्लैंड बश्कार चौथा क्रिकेट टेस्ट मैच विजन कुसै नतीजे दे मुक्की गेआ।

LS-Op Sindoor

लोकसभा च अज्ज आपरेशन सिंदूर पर चर्चा शुरू होई सकदी ऐ। संसदीय मामलें दे मंत्री किरन रिजिजू होरें पैहले दस्सेआ हा जे पहलगाम आतंकी हमले ते आप्रेशन सिंदूर दे तैहत भारत दी कार्रवाई पर विशेष चर्चा बरसांती आहले सत्र च होग। उनें दस्सेआ जे लोकसभा अध्यक्ष ओम बिरला हुंदी अध्यक्षता च कार्यमंत्रणा समिति दी बैठक च एह फैसला लैता गेआ हा। श्री रिजिजू होरें आखेआ जे बैहस आस्तै लोकसभा च 16 घंटे दा समें दिता गेआ ऐ। राज्यसभा च इस पर कल 16 घंटे तगर चर्चा होग। श्री रिजिजू होरें आखेआ जे विपक्षी दल आप्रेशन सिंदूर पर सदन च चर्चा दी मंग करा'रदे हे ते सरकार पैहले दिन कशा गै एहदे लेई सहमति ही।

<><><><><><>

PM-Op Sindoor

प्रधानमंत्री नरेंद्र मोदी होरें आखेआ ऐ जे आप्रेशन सिंदूर नै पूरे संसार गी दस्सी दिता ऐ जे देश दी सम्प्रभुता पर हमला होने पर भारत किस चाल्ली परता देग। श्री मोदी होरें आखेआ जे इस सैन्य अभियान नै पूरे देश च नमां आत्मविश्वास भरी दिता ऐ। प्रधानमंत्री तमिलनाडू दे गंगईकोंडा चोलापुरम च चोल राजा राजेंद्र चोल प्रथम दी जन्म शताब्दी समारोह गी संबोधित करा करदे हे। प्रधानमंत्री होरें आखेआ जे आप्रेशन सिंदूर नै एह बी साबित करी दिता ऐ जे भारत पर हमला करने आहले दुश्मनै ते आतंकवादियें दे छुप्पने आस्तै कुतै बी कोई सुरक्षित

ठिकाना नेई ऐ। मोदी होरें आखेआ जे आपरेशन सिंदूर नै पूरे विश्व गी स्पष्ट संदेश दिता ऐ जे अपनी सुरक्षा ते सम्प्रभुता च आंच आने पर भारत तगड़ेयाई कन्नै कार्रवाई करोग।

<><><><><><>

PM-Cholas

प्रधानमंत्री नरेंद्र मोदी होरें घोषणा कीती ऐ जे चोल सम्राट राजा चोल ते राजेंद्र चोल प्रथम हुंदी प्रतिमा तमिलनाडू च स्थापित कीतियां जांगन। उनें आखेआ जे उंदियां एह प्रतिमा उन्दे भारत दे इतिहास ते संस्कृति च योगदान देने आस्तै सम्मान दे तौरा पर स्थापित कीतियां जांगन। प्रधानमंत्री होरें आखेआ जे चोल साम्राज्य नै श्रीलंका, मालदीव ते दक्खन पूर्वी एशिया कन्नै निग्गर राजनैतिक ते बपार सरबंध कायम कीते। प्रधानमंत्री होरें तमिलनाडू दी मजबूत ते प्राचीन शैव परम्परा दी तरीफ बी कीती ते आखेआ जे 30 कोला मतियां दुलर्भ कृतियां जिनेंगी केंद्र सरकार नै दुनिया भर शा परतियै हासल कीता ऐ, तमिलनाडू कन्नै सरबंध रखदियां न।

<><><><><><>

Stampede-Probe

उत्तराखंड दे मुखमंत्री पुष्कर सिंह धामी होरें हरिद्वार च मनसा देवी मंदरै च मची दी नस्सभज्ज आहली घटना दी मैजिस्ट्रेट जांच कराने दा हुकम जारी कीता ऐ। हरिद्वार दे अप्पर जिला मैजिस्ट्रेट गी घटना दी जांच करियै 15एं दिनें दे

अंदर-अंदर रिपोर्ट जमा करोआने लेई आक्खी दिता गेआ ऐ। मुख्मंत्री होरें हरिद्वार च संवाददाताएं कन्नै गल्ल करदे होई आखेआ ऐ जे एह नस्सभज्ज आहली घटना अफवाह दे कारण पेश आई ऐ। उनें आखेआ जे अफवाह फैलाने आहले दोशिएं खलाफ सख्त कार्रवाई कीती जाग। जियां जे पैहले बी खबर दिती जाई चुकी दी ऐ जे इस हादसे च 8एं जनें दी मौत होई चुकी दी ऐ ते कोई 30 क जनें दे घाऽल होने दी खबर ऐ। मुख्मंत्री होरें मारे गेदें दे परिवारें लेई 2-2 लक्ख ते घायऽलें गी 50-50 जहार रपे दी सहायता देने दा ऐलान कीता ऐ। राष्ट्रपति द्रौपदी मुर्मू ते प्रधानमंत्री नरेंद्र मोदी होरें इस घटना च कीमती जानी नुकसान पर गैहरा दुख प्रगट कीता ऐ।

<><><><><><>

US-EU Trade

अमरीका ते यूरोपीय यूनियन नै यूरोपीय यूनियन शा अमरीका औने आहले मते सारे सम्यानें पर 15 फीसदी शुल्क लाने आस्तै इक बपार समझौते गी मुकदा रूप देई दिता ऐ। अमरीका दे राष्ट्रपति डोनाल्ड ट्रम्प ते यूरोपीय संघ दी अध्यक्ष उरसुला वॉन डेर लेयेन होरें रातीं एह घोषणा कीती जे उनें बपार समझौते गी मुकदा रूप देई दिता ऐ। अमरीका कन्नै समझौते आस्तै पैहली अगस्त दी समें सीमा तय कीती गेदी ही। इयां नेई होने पर 30 फीसदी शुल्क लाने दी चेतावनी दिती गेई ही।

<><><><><><>

US Tarrif

अमरीकी प्रशासन नै साफ कीता ऐ जे बदले च लाए जाने आहले टैक्स लेई मिथी गेदी खीरी तरीक जेड़ी पैहली अगस्त रक्खी गेदी ऐ, ओहदे च कोई बदलाव नेई कीता गेदा ऐ ते उसी अगड़े बधाने दी बी कोई योजना नेई ऐ। जंदी रातीं मीडिया कन्नै गल्ल करदे होई अमरीका दे बपार मंत्री होवार्ड लुटनिक हों बदले च लाए जाने आहले रेसीप्रोकल टैरिफ लागू करने गितै मिथी गेदी तरीक च कोई बदलाव करने दी मेद सवां इंकार करी दिता। उनें आखेआ जे एह टैक्स पैहली अगस्त कोला पक्क गै लागू होई जांगन। अजे तोड़ी 5 मुख्यें जिंदे च बरतानिया, वियतनाम, इंडोनेशिया, फिलीपीन्स ते जपान शामिल न, ते ट्रम्प प्रशासन कन्नै पैहले गै बपार समझौते पर दस्तखत करी लैते दे न।

<><><><><><>

Thanland

थाईलैंड ते कंबोडिया बश्कार अपना सीमा विवाद सुलझाने लेई अज्ज गल्लबात होग। थाईलैंड दे कार्यवाहक प्रधानमंत्री फुमथम बेचाया याची थाईलैंड दे शिष्टमंडल दी अगुवाई करंगन जिसलै जे कंबोडिया दे प्रधानमंत्री हुन मैनेट बी मेद ऐ जे इस गल्लबात च शामिल होग। तोआई बन्ने आहले तनाजे गी लेइयै जारी संघर्ष दरान मरने आहलें दी गिनतरी 32 होई गई ऐ।

<><><><><><>

Gujrat-Rain

गुजरात दे मते सारे हिस्सें च पिछले 24 घंटें दरान भारी बरखा पेई जेदे चलदे आम जनजीवन बुरी चाल्ली प्रभावित होआ ऐ। अहमदाबाद ते खेड़ा जिलें च एहदा मता असर दिक्खने गी लब्बा ऐ। मुखमंत्री भूपेंद्र पटेल होरें इस सिलसिले च जंदी रातीं गांधीनगर च राज्य अपात नियंत्रण केंद्र च इक विशेष बैठक सद्दियै हालात दा जायजा लैता। उनें बक्ख-बक्ख जिला कलेक्टरें कन्ने बी गल्लबात कीती ते उंदे जिले च जारी कम्में कारवाइएं दे बारै च जानकारी बी हासल कीती।

<><><><><><>

Cricket

भारत ते इंग्लैंड बश्कार एंडरसन तेंदुलकर ट्रॉफी दा चौथा क्रिकेट टेस्ट मैच ओल्ड ट्रेफर्ड च विजन कुसै नतीजे दे मुक्की गोआ। कल राती ओल्ड ट्रेफर्ड च मैच दे 5में ध्याड़े भारत नै दुई पारी च 4 विकटें दे नुकसान पर 425 रन्ज बनाए। पैहली पारी च भारत नै 358 रन्ज बनाए जिस्सलै जे इंग्लैंड नै अपनी पैहली पारी च 669 रन्ज दा बड़डा स्कोर खड़ा कीता। कल राती भारत नै 2 विकटें पर 174 रन्ज कोला अग्गे खेडना शुरू कीता हा। कप्तान शुभमन गिल नै 103 ते के.एल राहुल नै 90 रन्ज दा योगदान दिता।

<><><><><><>

Barabanki-Stampede

उत्तर प्रदेश दे बाराबंकी च अज्ज बड्डलै इक मंदरै च टीन दी छत पर बिजली दी तार आई पौने कारण मची दी नस्सभज्ज च 4 जनें दी मौत ते 29 लोकें दे घायल होने दी खबर ऐ। एह घटना प्राचीन अवसानेश्वर महादेव मंदर दे बाहर पेश आई जित्थै श्रद्धालु सौन म्हीने दे त्रीए संगार दे मौके पर शिवें दे दर्शन लेई रींगें च लग्गे दे हे। खीरी जानकारी थोने तगर 2 होर जनें दी हालात चिंता आहली दस्सी जा करदी ऐ। मुखमंत्रि योगी आदित्यनाथ होरें इस घटना दा आपू संज्ञान लेंदे होई अधिकारिणं गी निर्देश दिता ऐ जे ओह घायलें दे इलाज दी पूरी बवस्था करन।

<><><><><><>